

pænis, et capit. In archiepiscopatu, De raptor.; Pellegrin. loco cit., n. 67; Ventrigl., loco cit., n. 46; Barbosa, loco cit., n. 120; Rebuff. loco cit., tit. De forma vicar., n. 44 cum sequentibus, et alii.

(81. Neque sine speciali mandato potest condemnatum reum absolvere. Ripa, in leg. Qui condemnare n. 9. vers. Sed certe, ff. De re judic.; Menoch., De arbitrar. judic., lib. 1. q. 49, num. 28; Sbroz, lib. II, q. 38, n. 1, et qu. 156, n. 4; Barbosa, l. c. n. 118; Pellegrin., l. c., n. 63. Sive, ut dicitur, non potest gratiam facere et indulgere delinquentibus, nam id sapit liberalitatem, et non venit in generali mandato: card., in Clement. 1, n. 19, De officio vicarii; Rebuff., in Praxi benef., tit. De forma vicariat. archiepisc., n. 167; Sbroz, lib. II, q. 38, n. 4; Ventriglia, l. c., n. 46; Pellegr., l. c., n. 63, et alii.

(82. Neque sine speciali concessione potest exercere potestatem doctorandi, quam habet episcopus ex privilegio; secus si illi competeret jure communi: Sbroz, De vicar. episcop. lib. II, qu. 29, n. 8; Merol., Opusc. moral., III p., c. 6, dub. 16, n. 164 et seq.; Ventriglia, loc. cit., n. 46, et alii.

(83. Neque sine speciali commissione potest exsequi pias defunctorum voluntates. Bald., in l. Nulli, n. 8, cod. De probat. et in c. Cum causis, De election.; Tiraquell., De privileg. piæ causæ, privileg. 31, in fine; Sbroz, lib. II, q. 49, n. 12 et q. 50, n. 1 et q. 51, n. 1; Barbosa, loc. cit., n. 104; Pellegrin., loc. cit., n. 54 et alii.

(84. Ad dignoscendum autem pro quibusnam causis habeat, vel non, speciale mandatum, debet diligenter inspicere, et attendi forma vicariatus, seu instrumentum commissionis, quo quis institutus fuit vicarius generalis, ubi si habeatur solita apponi clausula generalis: « ad omnia et singula faciendi et omittendi, etiamsi majora fuerint, et quæ mandatum exigant speciale, prout ad ipsius vicariatus et officii officium noscitur quomodolibet pertinere, » etc., tunc si episcopus antea concessit vel expressit aliquos casus speciale mandatum requirerentes; adjecta postmodum dicta clausula, poterit vicarius etiam alia facere, quæ requirunt speciale mandatum. Dummodo non sint graviora vel majora expressis, prout in simili habetur decisum quoad procuratores in cap. Qui ad agendum 4, De procuratoribus in 6, et Clementin. 2, De procuratoribus, ac notat Glossa pluribus adductis in capit. Licet. 2, verb. Committantur, De officio vicarii in 6, et tenent Hostiensis in capit. Significasti, De officio archidiaconi, Covarruvias, l. 1 Variar. resolut., capit. 1, n. 2, et lib. II, cap. 5, n. 8; Sbroz lib. I, q. 63, n. 5, et q. 67, n. 3. Garcias, De benefic., art. 5, cap. 8, n. 63; Sanchez, De matrim., lib. III, disput. 29, n. 8; Moneta, De commutat. ultim. volunt., cap. 5, n. 679; Engel, lib. 1 Decretal., tit. 28, n. 10; Reiffenstuel, ibid., n. 89; Barbosa, loc. cit., n. 124; Pellegrin., l. c., n. 71, et alii notantes non esse necesse, quod omnes supradicti casus expri-

mantur in forma vicariatus, seu instrumento commissionis, sed sufficere quod aliqui tantum exprimentur cum prædicta clausula generali: Ad omnia, et singula, etc., seu cum alia simili, verb. grat.: « Et omnia alia, licet mandatum exigant speciale, » seu; « Et omnia alia, quæ ego possum, quamvis mandatum exigant speciale: » dummodo tamen, ut supra dictum est, ipsa alia non sint graviora, vel majora expressis.

(85. Vicarius generalis non potest lucrari distributiones, nisi choro intersit, quia servit episcopo, et non Ecclesiæ, ut vicarius capitularis: Rota, in decis. 222, n. 5, part. II diversarum, etiamsi ab immemorabili tempore servatum fuerit, ut debeantur, ut decisum refert Garcias, addit. ad cap. 2, n. 359 cum seq., part. III, De benefic., et Pellegrin., loco citato, sect. 4, subsect. 4, n. 9. Vide verb. DISTRIBUTIONES, art. 2, n. 2.

(86. Vicarius generalis non potest absolvere etiam cum reincidentia occasione infirmitatis seu similis causæ, a censuris incursis ob violatam immunitatem et libertatem, ac jurisdictionem ecclesiasticam, et acriter reprehenditur ob absolutionem datam ministris Audientie Regiæ censuratis simili de causa. Sac. cong. Immun. in una S. Marc. 13 Decembris 1633, lib. II Decret. Paul., pag. 180, et in Squillac. 20 Novemb. 1640, lib. Decret. Pauluc., pag. 135.

(87. Attamen eidem datur aliquando facultas absolvi violatores prælatos. Sac. cong. Immun., in Aprutina. 25 Maii 1694, lib. I Decretor. Vallem., pag. 125.

(88. Et etiam aliquando datur facultas eidem subdelegandi pro conferenda absolutione. Sac. cong. Immun., in Viterbien. 9 Junii, dicto anno et lib., pag. 128.

(89. Emolumenta vicariatus debentur vicario pro tempore suæ absentie ex causa defensionis immunitatis ecclesiasticæ, dempta parte debita substituto pro rata laboris taxanda ab episcopo. Sac. cong. Immun., in Majoricen. 27 Septembris 1616, lib. Decret. Rocci, pag. 361.

(90. Vicarius generalis, si non adest justa causa, et demeritum, non est removendus per archiepiscopum ab officio. Sac. cong. Immunitatis in Brundusina 7 Junii 1633, lib. II Decretor. Paul., pag. 158.

(91. Quando vero vicarius generalis est scandalosus, injungitur episcopo ut ipsum removeat. Sac. cong. Immun., in Acerenen. 1 Octobris 1659, lib. II Dec. Altov., p. 406.

(92. In loco vicarii suspecti in causa detentorum pro prætenso homicidio, episcopus deputet personam idoneam non suspectam. Sac. cong. Immunitatis, in Aversana 8 Octobris 1637, lib. Decret. Rocci, pag. 37.

(93. Procedere debet auctoritate sua ordinaria ser. ser. contra violatores Immunitatis. Sac. cong. Immunitatis, in Aversana 4 Septembris 1638, d. lib., pag. 53.

(94. Vicarius collegii Græci potest procedere pro defensione immunitatis et jurisdictionis ecclesiasticæ, licet non possit se ingerere in concernentibus extractionem vel absolutionem. Sacra cong. Immun. in

Meliten. 23 Martii 1638, lib. III Decret. Paul., p. 57.

(95. Vicarius data præventionem curiæ ecclesiasticæ procedere potest ser. ser. contra judicem laicum, si in dicta causa procedat ad descriptionem honorum. Sac. cong. Immun., in Dertonen. 10 Sept. 1652, lib. V Decr. Paul., pag. 197.

(96. Eidem injungitur, ut procedat contra executores curiæ laicalis, qui tentarunt violenter extrahere ab ecclesia confugitos, eosque percusserunt. Sac. cong. Immun., in Sutrina 29 Augusti 1695, lib. Dec. Vallem., p. 210.

(97. Injungitur vicario, ut se absteineat a permissione examinandi testes in loco immuni in causis criminalibus. Sac. cong. Immun., in Laudan. 16 Maii 1632, lib. II Decr. Paul., pag. 127.

(98. Vicarius tamen generalis cum facultate Sanctissimi examinat mulierem existentem in conservatorio. Sac. cong. Immun., in Faventina, 6 Dec. 1692 lib. II Decr. Vallem., pag. 9.

(99. Vicario generali injungitur, ut attenda absentia episcopi, redeat quamprimum ad suam residentiam. Sac. cong. Immun., in Bictecten. 27 Febr. 1693, lib. Decret. Vallem., pag. 475.

(100. Vicarius bene agit non parendo litteris ad audiendum verbum regium. Sac. cong. Immun., in Catacen. 21 Septembris 1633, lib. II Decret. Paul., pag. 171.

(101. Idem respondeat litteris regis se procedere auctoritate sua ordinaria ad defensionem immunitatis ecclesiasticæ sibi a sacra congregatione demandatam. Sac. cong. Immun., in Bovinen. 26 Febr. 1658, lib. Decr., Rocci, pag. 63.

(102. Idem ob inobedientiam et transgressionem mandatorum Sanctissimi de non discedendo ab urbe Neapolis et de non relinquendo exercitio sui vicariatus ex quacunque causa, etiam positis quibuscunque minis, et præceptis ministrorum laicorum in contrarium, de ordine Sanctissimi a nuntio auctoritate sua ordinaria condemnatur in pœnam suspensionis ab exercitio ordinum, et inhabilitatis ad dignitates, beneficia et officia ecclesiastica cujusvis generis, quocunque loco, a quibuscunque, et quomodocunque in posterum obtinenda, sub pœna excommunicationis Summo Pontifici reservatæ, et quousque Sanctitati Suæ placuerit. Sac. cong. Immunitatis in Neapolitana 26 Maii et 19 ac 30 Junii 1660, lib. Decret. Rocci, pag. 257 et 259.

(103. Injungitur vicario generali ordinanti et scandalose assistenti extractioni canonicorum a loco immuni, ut accedat ad Urbem, et se justificet, quatenus vero non se justificet, inhabilitatur ad officia. Sac. cong. Immun., in Motulen. 2 Sept. 1681, lib. II Decret. Altov., pag. 2250.

(104. Vicarius Nullius Orbetelli, nequit extrahere confugitum ab ecclesia, cum non possint hoc præstare ordinarii episcopis inferiores. Sacra cong. Immunitatis, in Nul-

lius Orbetelli, 1669, l. II Decret. Altov., p. 315.

(105. Vicarius generalis ob extractionem a se ordinatam furum a loco immuni incidit in censuras, et prævia abolitione actorum suæ curiæ conceditur, ut absolvatur privatim. Sac. cong. Immun., in Recinaten. seu Lauretana 20 Maii 1596, lib. II Decret. Vallem., pag. 25.

(106. Vicarius generalis ordinans carcerationem parochi in loco immuni suspenditur ab officio arbitrio sacre congregationis. Eadem sacra congregatio Immun., in Albanen. 12 Septembris 1684, lib. III Decr. Altov., pag. 363.

(107. Verum si habeat facultatem a Sanctissimo extrahendi ab ecclesia, potest ad simplicem correctionem extrahere militem delinquentem, et in carceribus retinere pro aliquo modico tempore. Sac. cong. Immun., in una Nullius Orbetelli 21 Jun. 1644, lib. III Decr. Paul., pag. 230.

(108. Aliquando etiam de mandato Sanctissimi datur vicario generali facultas extrahendi ad annum. Sac. cong. Immun., in Neapolitana 19 Maii 1703, lib. III Decret. Vallem., p. 409.

(109. Vicarius generalis canonicus ob datam gubernatori regni Corsicæ facultatem extrahendi confugitos a quacunque ecclesia, et etiam ecclesiasticos, eosque nomine Ecclesiæ custodiendi et cogendi ad solutionem condemnationum ipsius factarum ab ipso vicario acriter punitur de mandato sacre congregat., ut sequitur:

« I. Prævia suspensione a divinis, et perceptione fructuum canonicatus. Sac. cong. Martelli, pag. 567.

« II. Deinde in honorem festivitatis D. N. sacra congregatio permittit episcopo illum reintegrare ad exercitium ordinum per duos menses, et informet, an fructus ejus canonicatus fuerint sequestrati? Item si, et quæ damna passi fuerint extracti vigore dictæ facultatis ab eo concessæ. Sac. cong. Immunitatis in eadem 19 Decembris dicti anni, et lib. pag. 701.

« III. Et cum postea idem supplicasset reintegrari, sacra congregatio respondit: Satisfacta parte de damnis coram episcopo liquidandis, eundem reintegret ad ordines cum inhabilitate exercendi munus vicarii in quacunque diocesi. Sac. cong. Immunitatis, in eadem. 11 Decembris 1691, lib. Decret. Grimaldi, pag. 58.

« IV. Tandem habito novo recurso pro gratia, allegata præsertim ejus decrepita ætate, sacra congregatio pronuntiavit: facto deposito arbitrio, et præstita cautione in urbe de reficiendis damnis liquidandis coram Domino ponente, reintegretur ad ordines, et fructus præbendæ, firma remanente inhabilitate ad officium vicariatus. Sac. congregatio Immun., in eadem 24 Decembris 1682, lib. I Decr. Vallem., pag. 14.

(110. Contra vicarium generalem, qui habuit recursum ad proregem pro delegatione judicis laici contra clericos, a quo carcerati fuerunt, episcopus Neocastren., tanquam delegatus, et uti vicinior procedat ad ulteriora,

et transmittat. Sac. cong. Immunitatis, in una Nullius S. Euphemie 2 Junii 1693, ibid. pag. 40.

(111. Vicarius generalis episcopi uxoratus mandans carcerationem ecclesiastici consulat conscientie sue et carceratio non sustinetur. Sac. cong. Imm., in una Civitatis Castelli 29 Novembris 1680, lib. II Decret. Altov., p. 289

(112. Vicarius generalis, satisfacta parte, absolvat, juxta suas ordinarias facultates committentes homicidium in loco immuni auctoritate privata. Sac. cong. Imm., in Carriaten. 1 Octobris 1669, lib. I Decr. Altov., pag. 406.

(113. Eidem datur facultas perquirendi et extrahendi ab ecclesia, et a domo plebani, et a quocunque alio loco immuni (exceptis monasteriis sanctimonialium) libros, ac mobilia ibi transfugata in aliorum prejudicium, ac res furto sublata. Sac. cong. Imm. in Faventina 6 Decembris 1692, lib. I Decret. Vall., p. 9, et in Camerinen. 17 Decembris, dicto ann. et lib. pag. 11.

(114. Injungitur eidem, ut absteineat a cognitione cause contra filium cancellarii episcopalis. Sac. cong. Imm. in Ariminen. 6 Junii 1662, lib. Decret. Rocci, pag. 403.

ADDITIONES EX ALIENA MANU.

(115. Amplissima est materia hujus articuli, de ea pro dignitate agere haud patiuntur angusti limites Additionum. Satis sit indicare, qui de ipsa accurate præ caeteris disserit. Vide clarissimum Ducasse, in *Prax. jurisdiction. ecclesiast. voluntar. et contentios.* In priori tomo agit doctissimus hic auctor de voluntaria jurisdictione vicarii generalis, et in posteriori tomo de contentiosa ejusdem jurisdictione, et quidem meo iudicio doctissime.

ARTICULUS III.

Quoad ea quæ concernunt locum, præcedentiam et modum quo expirat vicarii generalis jurisdictione,

Hæc speciatim habeto.

(1. Locus vicarii generalis debet esse secundum consuetudinem Ecclesie, quæ non est mutanda. Sacra cong. Rituum, in Alexandrina 15 Martii 1668, in respons. ad 3 dub., apud Barbosam, in *Summa Apostolicar. decision. collectan.* 714, n. 1.

(2. Vicarius generalis non potest sedem arbitrio suo sibi parare, sed debet sedere in sede solita pro vicario assignata. Sac. cong. Rit., in Neritonem. 4 Maii 1606, apud Barbosam, *loc. cit.*, n. 2, et Ventrigliam, tom. II, adnot. 14, § 2, n. 7.

(3. Vicarius generalis, licet sedeat in primo stallo chori, in quo sedere debet prima dignitas, et habeat thuris et pacis honorem ante omnes dignitates, et canonicos, non propterea dicitur occupare stallum, sive locum dignitatum et canonicorum. Sac. cong. Rituum in Placentina 19 Maii 1607, in responsione ad dub., apud Barbosam, *loc. cit.*, num. 3.

(4. Vicario generali occupante primum

locum chori et stallum archidiaconi, quomodo sedere debeant dignitates in choro, ne archidiacono præjudicium inferatur? Vide supra verb. VICARIUS APOSTOLICUS, n. 30.

(5. Vicario generali non licet occupare locum episcopi absentis, nec parare sibi sedem cum tapetis, et pulvino, sed idem debet esse ejus locus, absente episcopo, quem illo præsentem habere consuevit. Sacra cong. Rituum, in Brundusina 16 Julii 1605, apud Barbosam, *loc. cit.*, num. 5, et Ventriglia, *loc. cit.*, n. 7.

(6. Vicarius generalis præcedit capitulo, et clero. Sacra cong. Rit. in Meliten. 15 Julii 1619, apud Bar., *loc. cit.*, n. 6.

(7. Vicarius generalis, absente episcopo, debet habere primum locum super omnes dignitates et canonicos, non obstantibus consuetudinibus, aliisque in contrarium. Sac. cong. Rituum in Adriem. 7 Augusti 1610, in Ferrarien. 20 Decembris 1614, apud Barbosam, *loc. cit.*, n. 7.

(8. Vicario generali habitu vicarii in processionibus incedenti danda est præcedentia super omnes dignitates et canonicos, et etiam super illas dignitates, et canonicos, qui habitu protonotarii incedunt. S. cong. Rit. in Brundusina 16 Julii 1605, apud Barbos., *loc. cit.*, n. 8.

(9. Vicarius generalis debet præcedere omnibus canonicis, tam in processionibus quam in sessionibus; dummodo canonici non incedant parati. Sac. cong. Rituum, in Egitanien. 3 Augusti 1602, in responsione ad 3 dub. et Civitatis Pennæ 12 Aprilis 1603, et in Tiburtina 6 Martii 1515, apud Barbosam, *loc. cit.*, n. 9.

(10. Vicarius generalis canonicus, cum sedet uti canonicus, debet sedere in loco sue receptionis, et in habitu canonicali. Si vero velit præcedere uti vicarius, debet habitum canonicensem dimittere. Sac. cong. Rit. in Compostellana 4 Febr. 1600, et in Vulturarien. 11 Aprilis 1601, apud Barbosam, *loc. cit.*, n. 10.

(11. Vicarius generalis in habitu suo ordinario non debet incedere inter canonicos paratos, nec eis præcedere. Sac. Rit. cong. in Camerinen. 14 Junii 1608, et in Casalen. 5 Julii 1614, apud Barbosam, *loc. cit.*, n. 11.

(12. Vicarius generalis debet habere primum locum ante capitulum, canonicos et dignitates, tam præsentem, quam absentem episcopo; si autem sit canonicus, debet sedere in proprio stallo, et cum habitu canonicali, alias non lucratur distributiones quotidianas. Sac. cong. Rit. in Egitanien. 10 Dec. 1601, et in Sutrina 1 Octobr. 1616, et in Oritana 5 Aprilis 1620, et in Gallipolen. 21 Decembris 1613, apud Barbosam.

(13. Vicarius generalis præfertur archidiacono, et omnibus canonicis, nisi ipse simul sit canonicus, qui tunc sedere debet in suo stallo canonicali, si distributiones quotidianas lucrari velit. Sac. cong. Rit. in Nolana 8 Julii 1602, et in Civitatis Pinnæ 12 Aprilis 1603, et in Compostellana 14 Fe-

bruarii 1604, et in causa Candie 7 Augusti 1610, apud Barbosam, *loc. cit.*, n. 13.

(14. Vicarius generalis canonicus, præsentem præposito suo principali, et in omnibus actibus Capitularibus, et quocunque distributiones quotidianas lucratur, debet stare vel sedere, et incedere in suo loco canonicali; absente vero præposito, tanquam vicarius generalis in primo et digniori loco. Sac. cong. Rit. in Altinen. Nullius, 4 Martii 1606, apud Barbos., *loc. cit.*, n. 14.

(15. Vicarius generalis canonicus, sive beneficiatus, debet sedere in loco sue receptionis, et cum habitu canonicali sive beneficiati, ut lucratur distributiones, et quando vult præcedere canonicis seu beneficiatis, debet habitum canonicensem, seu beneficiati dimittere, et non potest percipere distributiones. Sac. cong. Rit. in Calaguritana 2 Aug. 1603. Nec lucratur distributiones quæ dantur interessentibus processionibus, nisi incedat in habitu canonicali. Sac. cong. Rit., in Compostellana 21 Februarii 1604, et in Brundusina 15 Julii 1607, apud Barbosam, *loc. cit.*, n. 15.

(16. Vicarius generalis, licet etiam ipso episcopo præsentem, in ecclesia, choro, processionibus, synodo, et aliis publicis et privatis actibus, canonicis et dignitatibus præcedere debeat, tamen hoc intelligitur, quoties canonici et dignitates hujusmodi in habitu canonicali, etiamsi cappa et rochetto utantur, stare, aut incedere consueverunt, non autem si pluviali, planetis, aut aliis sacris paramentis juxta cujusquam ordinis gradum sint induti, prout in distributione candelarum in die Purificationis, et in receptione cinerum feria quarta Cinerum, et similibus diebus, quibus episcopus solemniter celebrare ex ritu ecclesiastico teneatur: tunc enim non decet ut vicarius, præsertim si in suo quotidiano habitu existat eidem sacris vestibus paratus, sive stando, sive incedendo præcedat. Sacra congregatio Rituum in Lauretana et Nolana 23 Martii 1602, et 6 Septembris in 1603 et in Tiburtina 6 Martii 1610, et in Metropolitana 7 Augusti 1628, apud Barbosam, *loc. cit.*, n. 6.

(17. Vicarius generalis licet præcedat omnibus dignitatibus et canonicis, tamen ratione paramentorum in distributione candelarum et palmarum non debet habere locum digniorem, quam canonici parati; in adoratione vero crucis, et quocunque canonici non sunt parati, digniorem locum habet immediate post celebrantem, et similiter thurificandus est ante canonicos, nisi sint parati, quia tunc post canonicos est thurificandus. Sacra congregatio Rituum, in Placentina, 19 Martii 1607, in resp. ad 6 dub. et in Alexandrina 25 Martii 1608, in resp. ad 1 dub. Et quod in adoratione crucis præferendus sit vicarius generalis ante dignitates et canonicos, censuit ead. sac. cong. Rit. in causa S. Marci 4 Martii 1633, apud Barbos., *loc. cit.*, n. 17.

(18. Vicarius generalis non præcedit dignitatibus et canonicis paratis, consuetudine in contrarium non obstante. Sacra congre-

gatio Rituum in Lauretana 6 Septembris 1603, et in Casalen. 2 Julii 1614, et in Castellaten. 25 Septembris 1621, apud Barbosam, *loc. cit.*, n. 18.

(19. Vicario generali præcedunt canonici sacris vestibus induti, qui assistunt episcopo celebranti. Sac. cong. Rit., in Nepesina 27 Febr. 1610, apud Barbosam, *loc. cit.*, n. 19.

(20. Vicarius generalis canonicus in funeralibus debet cum canonicis in suo loco incedere, alias non lucratur ceram, nec distributiones. Sac. cong. Rit., in Nicien. 20 Maii 1604, apud Barbosam, *loc. cit.*, n. 20.

(21. Vicarius generalis præsentem episcopo, in die Purificationis non debet accipere candelam ante canonicum, vel dignitatem, qui episcopo ministravit. Sacra congreg. Rituum in Lucerina 14 Maii 1600, in resp. ad 3 dub. apud Barbosam, *loc. cit.*, n. 21.

(22. Vicarius generalis non est prælatus, licet absente episcopo, cum in suo habitu ordinario cum subtana, et mantelletto nigro sedeat in choro in primo loco supra canonicos, thurificandus est duplici, non autem triplici ductu thuribuli. Sacra cong. Rit., in Nepesina 15 Januar. 1627, apud Barbosam, *loc. cit.*, num. 22.

(23. Vicarius generalis thurificandus est, et debet accipere candelam, palmam et cineres, et adorare crucem ante, vel post capitulum juxta Ecclesie consuetudinem. Sac. cong. Rit., in Neocastren. 16 Januarii 1607, et in Alexandrina 15 Martii 1608, apud Barbosam, *loc. cit.*, n. 23.

(24. Vicarius generalis in spiritualibus juxta Ecclesie laudabilem consuetudinem debet semper in omni loco præcedere gubernatori civitatis in temporalibus, tam præsentem, quam absentem episcopo. Sac. Rit. congreg. in Ravennaten. 28 April. 1607, apud Barbosam, *loc. cit.*, num. 24.

(25. Vicarius generalis debet præcedere omnibus potestatibus, commissariis sive iudicibus temporalibus in sua diocesi existentibus. Sacra congreg. Rit., in Nucerrina Saxoferrati, 15 Maii 1610, apud Barbosam, *loc. cit.*, n. 25.

(26. Vicarius generalis episcopi debet præcedere commissario ubique, et in omni loco, tam præsentem quam absentem episcopo, non obstante consuetudine; dummodo non sit de gremio capituli, et incedat in habitu canonicali. Sacra congreg. Rit., in Reatina, 18 Maii 1616, et die 19 Januarii 1619, et in Terracin. 10 Aug. 1617, apud Barbosam, *loc. cit.*, n. 16.

(27. Vicarii generalis jurisdictione expirat: primo, per propriam ipsius renuntiationem expressam, vel saltem tacitam, ut si vicarius diocesim sui vicariatus egrediat et in longinqua abeat animo non amplius revertendi, tunc enim tacite renuntiasse censetur. *Communis.*

(28. Secundo, expirat ejus jurisdictione per remotionem seu revocationem ipsius ab episcopo factam; episcopus enim potest ad sui libitum, quotiescunque voluerit, vicarium generalem amovere. Arg. cap. *Omnis*